

建安縣志卷之一

圖攷

形體有圖紀事有攷前後方圓以右以左城池
井然宮宇巍然容民畜衆祀聖崇賢凡諸建設
坊里羅列關隘橋梁地脉相接披圖景仰燎如
指掌庶幾式懷豈惟想像志圖攷第一

建安縣志

卷之一 圖

建安縣




建安縣

四境圖

建安縣志

卷之一 圖





建安縣

城池圖

建安縣志

卷之一



圖

三

建安縣



公署圖

建安縣志

卷之一

圖

四





朱賢宋

學宮圖

建安縣志

卷之一 圖

五



山梨




文公祠

建安縣志

卷之一 圖

六



圖之

建安縣志

卷之一

七

映樓



星野

九州分野上應列星度之所躔封域屬焉置建
于閩地居上游爲古太平牽牛婺女諸說不一
攷其分秒按以遠近其塵其茫將何以闢善測
天文庶可專執志星野第二

周禮保章氏掌天文以星土辨九州之地七閩未有
所職然禹貢揚州之域南至於海七閩實揚州之南
境天官書云揚州之域星紀牽牛婺女之分前漢地
志粵地牽牛婺女分野後漢天文志牽牛主吳越隋

建安縣志

卷之一

星野

一

志云南斗三十二度至須女七度爲星紀於辰在丑
而吳越得其分野唐志云東南負海爲星紀又云南
斗牽牛星紀也又云南斗在雲漢下流當淮海間爲
吳分牽牛去河南寢遠自豫章迄會稽南逾嶺徼爲
越分宋天文志天市垣東垣南第六星亦爲星紀之
次元曆志以爲起斗四度三十六分六十一抄外入
吳越分星紀之次明天文志分野以福建郡縣並屬
斗牛之分一統志以爲屬斗牛之分第宋武安志載
鄭宗疆星經曰周天之數每星一度轄地一千四百

六里有奇閩在會稽東南距揚州三千里分度一
千四百六里之外則由揚州而南終斗歷牛至女魏
陳卓云會稽入牛一度蓋牽牛躋浙粵閩三省閩九
郡西屆樵川西北盡柘浦東抵長溪而清漳襟當嶺
南距會稽不上數百里實在分度一千四百六里之
內卽謂九閩咸隸會稽牛一度也固宜或又謂東閩
勝地惟建寧女野分司建寧九閩上游而建安附郭
首縣又豈在分度一千四百六里之外哉總之十二
次分配九州雖古有定論而封域有遠近之不齊度
建安縣志
卷之一
數有參差之各異惟侯善觀天者攷訂之庶有定準
云

建置沿革

附形勝

氣候

風俗

巢窟風邈堂構斯與王者創制百世相因析置
建安始自東漢興廢割并唐宋可按海宇廓清
仍舊車書險因地設氣以候殊習尚煩簡風俗
儉奢先進後進惟樸母華志建置沿革第三

周

屬七閩地職方氏辨七閩之人閩之名始此

秦

屬閩中郡

建安縣志

卷之一

建置

三

勾踐裔亡諸氏姓騶據閩自王始皇廢亡諸為
君長以其地為閩中郡

漢

高帝屬閩越

先是亡諸及粵東海王搖歸番陽令吳芮從諸
侯滅秦漢興佐漢擊楚五年立亡諸為閩越王
王閩中故地都冶惠帝三年舉高帝時平粵功

搖為東海王都東甌

即今浙江
永嘉縣

武帝屬會稽郡

建元三年閩越發兵圍東甌東甌請舉國徙江
淮其地復屬閩越六年閩越擊南粵南粵請救
天子閩越王郢發兵距險其弟餘善謀縱殺王
降立亡諸孫繇君丑為越繇王奉閩越祀餘善
以殺郢功立為東越王與繇王並處故又名東
越元鼎五年餘善反漢擊之元封元年繇王居
股殺餘善以降封居股為東成侯帝以閩越悍
數反覆徙其民江淮間遂虛其地久之逃遁山
谷者頗出立為冶縣屬會稽南部又名其地為

建安縣志

卷之一

建置

四

東冶縣

東漢

光武屬會稽南部都尉

帝初改冶縣為侯官都尉屬會稽郡後分冶縣
為東南二部都尉閩為南部都尉臨海為東部
都尉

獻帝建安初立三縣仍屬會稽南部都尉

分侯官之北鄉置建安南平漢興三縣

建安即今本府

南平即今延平
漢興即今浦城

建安八年賀齊進兵建安立都尉府
先是王朗奔東冶候官長商升爲朗起兵孫策
遣永寧長韓晏領南部都尉將兵討升以齊爲
永寧長晏敗齊代晏領都尉事候官與建安漢
興南平復亂齊進兵建安立都尉府

三國吳

景帝永安三年以會稽南部爲建安郡領縣十是
年析建安之桐鄉置建平縣改都尉曰太守領
建安建平吳興東平將樂昭武綏安南平候官
東安十縣仍治建安

建安縣志

卷之一

建置

五

晉

惠帝屬江州領縣七

先是武帝太康三年析候官東安置晉安郡惠
帝元康元年以屬江州領建安東平吳興建陽
將樂邵武延平七縣

江州卽今江西之九江府
晉安卽今福州迤南四府

宋

高祖仍屬江州

陳

武帝永定初屬閩州後屬豐州即今江西之撫州

隋

高祖開皇九年郡廢為縣屬泉州

文帝大業初屬閩州三年屬建安郡

是年析侯官地置閩縣并建安南安龍溪皆屬

焉治閩縣

唐

高祖武德四年改為建州改太守為刺史

舊志云是年移州治於建安領縣六尋為妖賊

建安縣志

卷之一

建置

六

武遇所陷五年刺史謝元治討之州復閩縣仍

屬復置唐興建陽將樂綏城并建安凡六縣唐興

即吳興

六年析閩縣置泉州建州領縣如故

七年領縣七邵武來屬

八年領縣六屬泉州都督府省建陽入建安

睿宗景雲二年屬閩州都督府

玄宗天寶元年隸長樂郡復改建安郡隸江南

東道採訪使

肅宗乾元元年復爲建州隸福州都督府
上元元年屬福州節度

代宗大曆六年隸福州都團練觀察置使

僖宗乾符五年賊黃巢毀州治州人陳巖率鄉兵
破之

五代

晉

高宗天福六年以建安鎮安軍王延政爲節度使
封富沙王後改鎮武立温嶺松源關隸三鎮

建安縣志

卷之一 建置

七

天福八年延政以建州建國僭稱殷改元天德
延政審知子俗
謂王三十郎

南唐

保大四年兵圍建州拔其地遷延政之族於金陵
州改爲永安軍尋改忠義軍領縣八

宋

太祖開寶八年南唐平復以其地爲州

太宗太平興國三年屬兩浙西南路
通志云屬
威武軍

雍熙二年改屬福建路

端拱元年升建寧軍節度

英宗治平三年領縣七

析建安建陽浦城三縣地置甌寧縣

神宗熙寧三年領縣六

省甌寧縣

哲宗元祐四年領縣七

析建安地之半復置甌寧建陽浦城之地不復與焉

高宗建炎二年州卒葉儂叛知州事方承移治建

陽四年范汝為作亂知州事劉子翼移治崇安

紹興二年神武右軍都統制韓世忠兵至建州

破之汝為自焚死三十二年升為建寧府

恭宗德祐二年元福建宣慰使行征南都元帥

建安縣志

卷之一

建置

八

峻都遣招討使百家奴丁廣取建寧

元

世祖至元初隸杭州

十五年改建寧路隸福州行中書省置錄事司

元史作二十六年

十七年改建寧路總管府隸福建道宣尉司

順帝至正二十二年立建寧分省尋據於陳友定

分省廢

元史作十八年

明

太祖洪武元年友定平復為建寧府屬福建布政司罷錄事司領縣仍舊置福建行都指揮使司又置建寧左右中三衛各領左右中前後五所俱治於此中衛年從太平府為建陽衛代宗景泰八年領縣八增置壽寧建安甌寧建陽崇安浦城松溪政和八縣建安附郭首縣

國朝因之

形勝附

建安縣附郭東接括蒼北距上饒西南引延平

建安縣志

卷之一

形勝

九

東北帶建溪居閩上游八縣之首為浙江之要衝福唐之喉襟又云閩號佳山水建安視閩中尤號奇峻又云南望鐵獅紫芝以次羣峰傍聯黃華白鶴之秀為東南勝地梁江淹云碧水丹山為郡之盛唐權德輿謂為東閩劇地楊億云建安保界閩越綿地八百盛均云其郡襟山帶水郡守韓元吉云溪行石中曾鞏道山亭記云閩之路陸出者或逆坂如緣組或垂崖如一髮或測徑鈎出於不側之溪上皆石苴峭發擇之

然後可以投步其溪則水皆自高瀉下石錯出其間如林立舟沂泐者投便利失毫分輒破溺其水陸之險如此

氣候附

按七閩居東南溫燥之地大抵多熱少寒建安處東偏地氣高栗故視他邑較寒然寒不裂膚故人多服單夾之衣遇隆冬霜雪亦不免擁爐入春卽和

正旦賀節者或以扇四月衣締綌至九月而止

建安縣志

卷之一

形勝

十

六月暑甚道路如炙屋宇之下坐席有薰蒸氣一雨卽涼氣襲人久雨則寒春多雨夏多驟雨風不甚號水無鹽鹵雪間有之然著地卽融不能積厚霜多至三日而止俗謂之厭霜山間四時多霧至午方消春秋冬三時尤甚中其氣者能使人疾病故早行必飲酒遮霧四時之交寒暄不時坐卧一失其宜卽感冒傷寒輕則令人發瘡俗云三月有青草瘴九月有木樨瘴卽其時也

元旦宜晴明六日十六二十六亦然諺云若閏
六種熟不熟但看年頭三箇六十四日占百果
十五日占晚稻十六占早稻晴則熟雨則歉雨
水後多陰主大旱驚蟄雷不震則泉脉不通方
春而雷又爲多雪之占諺云正月雷鳴二月雪
三月禾秧老生節言春雷主旱也三月三日天
陰無日無雨主蠶大善芒種日雨則水多魚諺
云雨芒種頭河魚淚流雨芒種脚捉魚不著芒
種後半月不宜雷謂之禁雷天小暑與小寒相

建安縣志

卷之一

氣候

十一

應晴則俱晴雨則俱雨大暑宜雨主晚禾熟白
露晴小麥熟立冬遇壬日至庚日得雨謂之掖
雨來春宜耕諺云掖雨不流籜高田不用作小
雪值朔日有東風主來春米賤西風主米貴小
寒晴則早禾熟大寒晴則晚禾熟民間諸占候
大抵爲農與穀耳其他非所及也

閩人云近二十年來較冷於昔地氣自北而南
耶往時冬雪甚少有霜僅三日過三日天陰謂
之厭霜必雨近霜且浹旬殆北方所未有然民

間以霜雪為祥主有歲尤喜雪遠村往往有之
晨起見四山峰頂皆白日出即融近城市絕少
今間有矣而霜顧於城市溪橋間獨厚至山溪
村僻處益薄疑為人煙水氣上蒸遇寒氣凝結
以成故霜不足以壓瘴須雪壓之九月有桂花
瘴失之傷冷四月有黃竹瘴失之傷熱然氣亦
輕不似粵地之毒瘴中之輒殺人也

風俗 附

建備五方之俗

宋張叔樸記

其民柔脆憚於遠行

方輿

建安縣志

卷之一

風俗

十三

覽勝志

處市井者好侈而尚浮居田里者勤身而

樂業

建安舊志

家有詩書戶藏法律其民之秀者狎

於文負其薦氣者亦悍以勁

宋韓元吉記

男女不混

於途少長各攻其藝民畏官府士重清議農力

甚勤不事商賈末技

舊志

晦菴西山二先生過化

之邦流風遺韻宛然猶存

明楊榮記

禮文

冠禮

今省

婚禮

問名納采與他處同間亦有親迎者

喪禮

初亡至歲哭臨疏者揖擇時日以殮七日
弔終四十九日安神酬賓不設音樂遇七
七期輒用浮屠度亡破獄非禮也

祭禮

初喪及發柩儀節遵文公家禮貧者辭賓
惟至戚者與祭

賓宴

先是宴會尚簡物薄情真肴不過五簋菓
不過數碟酒數行止非士夫家不侑優近
習爭尚奢靡雖販夫胥隸珍異羅列笙歌
錯奏號噉無度矣

建安縣志

卷之一

風俗

十三

教訓

男子或五歲七歲入鄉塾學書數作對偶
女子七歲裹脚七八歲學鍼刺

歲序

元日

祈年晨興潔廳宇陳酒菓焚楮幣拜內外
神既乃行家人禮親友更相造拜設酒食
凡五日止謁墓祭竈祭門亦五日止

立春

先一日迎芒神土牛於東郊所經街衢結
綵少長雜遝遊觀相飲樂徵逐至期然炭
放紙炮名曰接春是日俗忌不輕到人家

元夜

各于門首跨街為棚張燈祠廟坊社皆然好事者復為火龍熬山鳳鶴滾球諸燈佐以鼓樂沿街遊行歌聲達旦十一日至十五日止戊子亂後勝事遂廢數年來稍復一二無復從前風景矣

社日

坊鄉有社祭春日燕福秋日鴻福家祀司土以粥

清明

佩柳祀先掃墓添土塚上掛紙陌折柳枝插門左右名曰辟邪

建安縣志

卷之一

風俗

十四

上巳

取南燭木莖葉搗碎漬米為飯成紺色以食且相饋遺按烏飯即青精一名南天燭他處四月八日作杜詩云豈

無青精飯即此

浴佛

僧人以四月八日為釋迦誕日煎香水浴佛誦梵音托鉢求施

端午

懸艾菖蒲辟邪符兒童繫五絲於手足佩繭絲及符角黍相餉午飲雄黃蒲酒間有

龍舟競渡採藥合藥率以是日按松溪志以四日泛

蒲酒五日為閩王忌魏濟詩云吾家臨午節先日醉蒲觴云是閩王忌備令士女

天貺 是日曬書畫并衣且浴

七夕 設瓜果乞巧

中元 家懸祖先遺像自十 日至十五日止致

祭送冥衣僧人以是日作盂蘭盆會

中秋 以餅作月宮形張綵燈祀姮娥夜置酒賞

玩有掛旛燈乞嗣者

陽朔 十月朔謂之十月朝以豆米作糍祀先

冬至 不拜賀用糯米粉為圓或曰天圓也陽也

取其圓以達陽氣祀先饋遺俗謂團圓子

建安縣志 卷之一 風俗 十五

臘八 以百菓雜米作粥僧人以是日設供薰塔

祀竈 念四日拂塵掃舍宇滌器夜設飴糖燒爆

竹祀竈而送之自是親戚互為歲饋

除夕 換桃符春帖蒸粳米雜烏豆於內謂之歲

飯新正三日內重炊食之備牲醴祀神及

先祖迎竈薄暮然燭炭少長會宴酒行自

幼者起夜聚竹木敝器蒸門前做古松光

燄燭天爆竹聲連不絕有圍爐達旦者曰

守歲

山川

山靈川秀擁護金湯古稱丹碧實隸建安白雀
曉翔青鸞夕渡背倚黃華文瀾西注賢哲挺生
產芝十斛卜天地之陰晴占梨山之雲霧高不
可登深不可測陟辰峰之萬仞渺滄海之一粟
志山川第四

黃華山在府治東北秀麗為一郡之冠寰宇記云
劉宋元嘉初太守華瑾之徙郡治於此山之西
麓宋建炎初韓世忠討范汝為屯兵其上元至

建安縣志

卷之一

山川

十一

正末左丞阮德柔因陳友諒入寇築城山頂下
接舊城明洪武十九年都指揮時禹拓而廣之
包此山于城中永樂間郡人嘗於山頂建樓曰
黃華樓之臺曰冠山閣曰憑虛軒曰待月亭曰
咸宜山下有潭曰北潭明劉璣有萬堞城連青
薜荔半空雲擁翠芙蓉句後廢弘治六年副使
楊澤重建有記又廢嘉靖六年僉事伍希周重
建十三年燬十七年僉事汪佃闢故址復建有
記又廢天啟五年知縣仲嘉偕郡人陳國鑰重

建又建亭於半山中僉事張秉文扁其亭曰觀止甌寧知縣楊肇泰於山麓建黃華書院戊子俱燬

國朝康熙二十二年建安知縣張大典建真武廟于山頂圍以土垣有記二十六年協鎮謝思禮以郡城主山令軍士環山栽松又作半山亭以憩遊者有碑記

馬鞍山在府城東北三里又名瑞峯狀如馬鞍府之主山也宋淳熙中太守韓元吉以山低於客

建安縣志

卷之一 山川

十七

山乃植萬松于山麓有瑞峯寺今廢

鷄籠山在府城東北五里與馬鞍山聯屬竹木蒼鬱狀若鷄籠故名

白鶴山在府城東二里寰宇記云東晉時望氣者言山有異氣命鑿之朝鑿暮合已而有雙白鶴翔其上因名山之麓有東嶽行宮中有靈湧泉時有疾者飲之愈又有聖母池山麓有探春亭宋楊億詩野鶴時清唳春苔長綠衣東爲天馬山山巔有峯東分白鶴西接黃華中有白鶴山

房山下有明贈少傅楊達卿墓其孫公榮讀書
室于此山側有記

響山在府城東五里枕溪若傳聲之谷溪嶼有小
洞名浮石水泛不沒每風月之夜水中笛聲聞
於洲渚漢梅福煉丹響山其徒陳先生者每竊
食之福怒拔劍逐先生逃入此洞名逃奴洞

天馬山在府城東北二里狀若奔馬山巔有峰高
圓由東而分爲白鶴山西爲大黃華山自西而
來突起圓隴以至府治之後與小黃華山接

建安縣志

卷之一

山川

六

鳳凰山形如翔鳳上有鳳凰泉一名龍焙泉又名
御泉有堂曰茶堂前引三泉爲池曰龍鳳池池
中島曰紅雲島皆宋丁謂作也蘇軾鳳味石硯
銘云北苑龍焙山如翔鳳下飲之狀當其味有
石蒼黑堅緻如玉太原王頤以爲硯予名之曰
鳳味卽此是也今堂池俱廢而島猶隱隱可辨
右爲龍山在東者曰銅場峰

龍山狀如龍蟠與鳳凰山對峙左有龍鳳池

已上俱
吉苑里

象山在府城東南三里山形肖象其鼻廻轉抱水
一泓冬夏不涸名白象捲湖

滾坑山在府城南鐵獅峰下相傳王延政據建時
有蛟滾山成坑因名

梨山奇秀峭拔爲近城諸山之冠山頂雲起輒雨
遠近候之以下陰晴唐刺史李頻雅好此山每
公暇輒往登覽既卒郡人立祠祀之有臨清閣
映山樓玻黎亭凡遇亢旱遠近求禱雨遂應焉
壑源山在鳳凰山南高百丈所產茶爲外焙冠輿

建安縣志

卷之一 山川

十九

地廣記壑源茶卽此

曹高山上曹聖者茶場

鷄足山上有三峰狀如鷄足下有報恩院又名卧
雲菴

三門山僞閩王延政據建時嘗于此山置柵防守
故名

龍池山相傳有龍居山頂池中遇旱以物觸之甘
雨立至

屏風山羣峰聯屬拱揖左右中一峰壁立空翠若

屏故名

隊羊山在府城西連岡接隴而下形如隊羊故名

已上俱
將相里

東山在府城東北二十里一名蘓口山山下有賓

鳳堂可詩臺明林俊有記郡人御史滕祐嘗築

草堂于山麓

金盤山在蘓口山勢寬平如盤故名謝肇淛有詩

落日千岩靜孤雲半壑浮

已上俱
建寧里

虎頭巖山山多奇石狀類不一前聳一峰高大峭

建安縣志

卷之一

山川

三

拔若虎首然上有馬仙菴禱雨輒應

京拿山在虎頭崑側形如傘下有孤石高聳如人

拱立俗又呼為石人山

已上俱
外里

八仙山俗傳有仙人過此山之上足迹隱隱猶存

其旁為靈巖為寶勝崑上有飛泉百尺望之若

玉虹然

在川
石里

雙髻山又名筆架山

在安
太里

辰山建寧諸山之崑高者其巔可望海日初出處

山有三峰曰逍遙曰飲坑曰牛頂又有石若鼓

擊之有聲又有牛心洞廣可丈許其深莫測中
懸一石如牛心鄉人遇旱往洞中以紙擦石俟
水滴乃盛以潔器迎出甘雨隨至然不誠不可
得也下有蘆竹洞有蛟窟禱雨亦應在東
長里
大富山在白塔龍岸山不甚高而土脈膏潤因名
元季邑人楊達卿樂善好施值歲饑不欲有賑
恤名乃託有於此山種木一株者予之斗粟貧
者畢至請粟種木後木成林戒子孫勿售惟學
校祠廟橋梁及養生送死之需用之里人德之

建安縣志

卷之一 山川

三

因名萬木山明大學士胡
廣記見藝文

瑞峰山在白塔里人大師楊榮祖墓在焉建祠其
下因名瑞峰寺

仙人山在橫溪山自郭巖發迹高聳而下至此平
如仙臺網形故名

龜山在橫溪之東相傳曹聖者嘗為邑人雷氏擇
此地葬祖下有曹山寺祀先之所

隊魚山羣山突出若隊魚狀
印山形方若印

鳳山形如飛鳳

虎山其形如虎

已上俱在瑛溪房村上里

銅場七峰在吉苑里七峰連屬中三峰並峙比之

諸峰特異

在吉苑里

百丈峰世傳馬仙所居上有百丈巖巖畔有雙龍

泉歲旱禱雨輒應有寶蓋洞即馬仙飛昇之處

在登仙里

獬豸峰以形似名俗傳里中仕宦者多至風憲在房

村下里

建安縣志

卷之一

山川

三

黃桅峰地產黃桅峯下舊有三十六寺今存者五

石龜冷水威巖新安藥師數寺而已

在將相里

黃龍峰有馬仙祠

在南才里

靈地嶺相傳梅福修煉于此

蛟窟嶺相傳有蛟滾地成窟故名

天湖嶺嶺頂有水一泓

大雪嶺閩地暖惟此嶺雪積累日

曹岩嶺相傳曹聖者嘗棲息於此地產楊梅

丁坑嶺

已上俱房村上里

真武嶺上有亭祀真武君故址在登仙里

紅雲島在鳳凰山下茶堂前宋咸平間丁謂監茶

事主堂前引二泉為龍鳳中為島四面植海棠

晴光掩映如紅雲其上一今池廢而島猶隱隱

可識在吉苑里

寒巖下有南湖於巖之上

定心巖在唐徵君有道人結屋於岩前修行終

日禪定故名

威禮巖相傳有僧者建齋奉佛故名今廢

建安縣志

二十三

雲竹巖在登仙里

龍興巖前有龍潭

靈仙巖中有石如鼓扣之有聲祈禱輒應

圭峯巖附立如圭

石鼓巖上有石如鼓扣之有聲

瑞興巖左右嘗產芝

洋山巖巖前有田數頃一望平衍

寶曆巖有菴奉魏仙今廢在登仙里

伏獅巖形肖伏獅下有潭俗呼為越王潭在房村下里

卧牛巖形似卧牛下有竇可容數人

在東長里

寶勝巖有飛瀑百丈

靈巖巖方而兩穴相疊有雲氣起則數日必雨

俱在

川石里

吉雲巖宋侍郎袁樞立菴祀龔劉楊三聖者鄉民

有禱輒應

在南才里

鶴峯巖其狀似鶴故名岩前兩山竝立俗呼為寒

山拾得山上有菴祀魏王錢鏐二仙旁有水一

泓里人病眼者汲而洗之即愈

建安縣志

卷之一

山川

三姑巖山形高峙如人立狀

山佛

冥陽洞深邃初入甚暗良久方明舊志云即後漢

宜新太守楊仲產所居之地

在南才里

浮石洞在響山前蓋溪中小嶼水泛未嘗見其沒

人以爲與之俱浮相傳漢梅福煉丹響山其徒

陳先生者每竊食焉福怒拔劍逐之遂逃入洞

中福曰此吾丹之功也乃釋之故又名逃奴洞

風月之夜舟泊其濱者或聞水中笛聲

紫霞洲在府城中和坊宋淳熙間郡守韓元吉闢

北園以增府治濬池導泉作亭臨之號紫霞洲
蓋取幔亭紫霞禱之義內有玉仙池晉元吉所
濬者其源出處州龍泉至烏龍巢口南注經月
城僧舍穿城而入渚爲大池蓋宋於此置豐國
錢監引之以給鼓鑄之用紹興以後官冶停鑄
水道弗修民多竊引以溉私植韓元吉趙善備
相繼修治之水仍入于池今遺迹尚存按通志
謂故老相傳宋朱熹嘗卜居于紫霞洲構亭于
其左偏曰溪山一覽考之祝穆著方輿勝覽載

建安縣志

卷之一 山川

二十五

紫霞洲竝不言熹嘗居之穆于熹表姪此無所
載竊意熹子在所構而相傳之誤也

東溪在府城政和門外發源於處州松源會松溪
政和水而下至城東南逶而西合甌寧西溪之
水爲一大溪南注延平抵福州入海按方輿勝
覽謂建溪源出自武彞至城外卽今東溪或謂
唐人詩雷霆入地建溪險卽此按東溪源出松
源在府城東而發源武彞者爲東溪誤矣且西溪
方輿勝覽以發源武彞者爲東溪誤矣且西溪

有二源而獨謂之出武夷亦考之未審也

安泰溪源出福州府古田縣界

東游溪源出政和甌寧二縣界首經東游市入東

溪已上俱安太里

東安源溪出甌寧縣界注東溪在吉苑里

川石滌溪源出政和縣界經蓬源至蓬口入東溪

在川石里

順陽口溪源出福州古田縣界在順陽里

東坤口溪源出甌寧縣界經建寧里入東溪

建安縣志  卷之一 山川 二十六

橫谷溪源出甌寧縣界流注經建寧吉苑二里抵

橫谷舖下入東溪已上俱建寧里

古老嶺溪在吉苑里源出法雲山下經石門嵐下

至古老嶺下入大溪

東莨口溪源出古田縣界經莨口入東溪

山溪源出古田縣界分流至千源會陂頭二水入

東溪已上俱在東莨里

沙溪源在南才順陽二里經本里入千東溪在將相里

普通溪源出南鄉經本里入東溪在登仙里

秦溪源出古田縣界經本里迤南瓦口入於大溪

在外里

房村口溪源出上里白塔經甌寧縣高陽里大坵

至葉墩橋下范墩入大溪

在房村下里

璜溪源出丁坑合九漈白塔大富四流經房村口

入大溪其溪環如佩璜故名又云唐雷鸞鈎璜

之所

桃源溪出桃岩會璜溪

起莘溪出九深岩會璜溪

建安縣志

卷之一 山川

二十七

龍潭溪源自白雲岩會璜溪

上里

南澗在寒岩下源出岩上下成小澗

在登仙里

北潭在府城內黃華山前

蛟潭蕭子開記云昔有樵者見潭上浮槎有金環

如指大漲而取之遂罹其害即此潭也

在吉苑里

白塔潭潭側舊有白塔故名

在吉苑里

越王潭伏獅岩下相傳越王曾遊此

在房村下里

密黯灘水勢洶湧能覆舟鄉人因立靈山廟鎮之

在安泰里

書筒灘有石肖書筒故名俗傳羅隱云書筒落水
川石無官里人惑之遂廢學明少師楊榮教諭
賈暹俱有記辨其非後人知學復有仕宦者在

石里二記
見藝文

梨灘甚險舟人在來憚之在登
山里

鳳凰泉茶焙中泉甚清潔上供茶用此濯之在吉
苑里



建安縣志

卷之一 山川